

Der Zauberspruch

1. Markiere deinen Text mit Farbe, so dass du ihn schnell findest.
2. Übe deine Rolle, so dass du dich nicht mehr auf den Inhalt konzentrieren muss.
3. Versuche dich in die Rolle zu versetzen und versuche den Text so auszusprechen, wie es unter "Besonderheit" beschrieben ist.
4. Übt nun den die Szene in der Gruppe.

Rolle	Abkürzung	Besonderheit	Leseniveau
Erzähler:in	E	Ruhige Stimme	hoch
Winnie	W	Flippig, schnell, fröhlich	mittel
Tack	T	Nachdenklich, ängstlich	mittel
Magierin (als Krähe)	M	Krächzende Stimme	hoch

T	Hoffentlich sind mir da wirklich in Sicherheit vo de Wächter. Es wär praktisch, mir würdet gseh, ob wiiter vorne öper steht und ois kontrolliere wet. ...hmmm... Chräie, chasch flüg doch chli vorus und gib ois Bscheid, falls Wächter patrolliered!
M	Krah.. ich han doch gseit, ich trau mine Flügel nöd... und usser dem bin ich no NIE i mim Läbe gfloge!
W	Chum scho, probiers doch wenigstens. Wer weiss, vilicht findsch es richtig toll! Und nacher went wider e Magierin bisch, chaschs nöme usprobiere!
M	Hmmm... jaa.. da hesch rächt. Falls es wirklich klappt, mich zrugzverwandle, hani die Glegeheit nöme so schnäll..... ok... ich probiers... krah.
E	Wow, di Gschwüsterte händs doch no gschafft, d'Magierin zum Flüüge zmotiviere. Vorsichtig breitet sie ihri Flügel us, bewegt si es paar Mal chräftig ufe und abe und stiigt den langsam Meter für Meter immer höher in Himmel. Si gwagglet zwar no chli hi und här, aber schiint Spass debi z'ha. Das gaht es Wiili lang guet, doch denn chunt plötzlich en heftige Windstoss und d'Magierin verlürt d'Kontrolle.
W	Achtung Frau Makrux! Nöd, dass du dir no en Flügel brichsch!
T	Ui nei, ich hoffe si chan sich wieder fange. Flüge isch wahrshindli gar nöd so eifach, wies bi de Vögel usgseht. Min chline Ikarus gshet ämel einiges eleganter us i de Luft.
M	Kraaaaaaahhhh.....

W	Autsch! Achtung mini Haar! A, was machsch du?
M	Potz Kakerlaketopf jetzt wäri doch würekli fast abgstürzt, debi hani gmeint ich chan jetzt scho chli besser flüge..... Und jetzt hani au no i dine Haare verhederet bim Lande. Sonen doofe Chräie-körper.... isch eifach s'Hinterletscht! Aber Soldate hani keini gseh, die sind hüt wohl noimet anderst postiert. krah.
T	Du chasch froh sie, dass kein Regewurm oder Blutschnägg oder sogar en Floh worde bisch! Ich glaub dänn hettemer dich gar nöd wahrgno.
W	Also en Floh hetti jetzt au nöd gern i mine Haar, dänn also lieber e Chräie wo grad flüge lernt. Hihiihi... So jetzt hämmers dänn glaub gschafft mini Haar us dine vilne Fädere uszfädle.
M	Krah, krah... Ich halt das also nüme lang us als Chräie... ich föhl mich so machtlos ohni mini Chräft.
T	Was? du chasch gar nöd zaubere im Moment? Wie söllemer dänn de mächtig Schwur mit de 3 Teil vo dem Chraftstei anebringe? Mir känded nämli kei Zauberformle.
M	Verflix a das hani gar nöd dänkt! Das chönt ja würekli es Problem werde. Neiii, denn bin ich wohl für immer i dem Körper gfange. Krah, krah
W	Also würekli! du bisch scho chli e Dramaqueen! Ich chan mir ja ganz schnell en Zauber usdänke. Abrakabra, simsalabim und du bisch wieder e Mänsch.
M	Verschimmlete Kakerlaketopf! Das isch doch kein Zauberspruch! Abrakadabra und simsalabim säged nur die Zauberer wo ebä kei Zauberer sind und reime duet sich din Spruch au nöd. Da münd ihr oi scho chli meh Mühe gä!
T	Also jetzt bin gspannt. Chömir also würekli en Zauberspruch usefinde? Musses sich nur reime?
M	Natürlü muss en Zauberspruch en tüüfe Wunsch enhalte. ICH WETT WIEDER EN MENSCHEKÖRPER! Und es muss sich reime.
T	A, ich weiss öpis: Liebe, liebe Zauberstei, mach die Chräie zu äh...was reimt sich jetzt?... Haferbrei
W	Und dänn wird us dem Haferbrei, en Mensch grad jetzt, eins, zwei, drei! Das isch genial Tack, mir sind echti Magier!

M	Genial?! Wänn das s'beste isch, dänn Endi no als Haferbrei! Das isch de katastrophalsti Schwur woni je ghört han, das chan doch nöd wahr si, i oine Händ lit mis Schicksal und ihr wänd mich zu Haferbrei verwandle.... Kra kraaa
E	Ei, ei, ei! Da muss ich de Frau Makrux also recht gä. Ganz so villversprächend tönt de Zauberspruch würklich nöd. Aber sicher händ ihr no e besseri Idee! Chönd ihr reime und en Spruch usefinde? Tüftlet mal ume. Villicht händer e Idee uf Hochdütsch oder suscht inere Sprach.
W	Ou ja, erfindet doch au, denn sinder ÄCHTI MAGIER!